

3  
EXERCITATIO MEDICA  
De

# FEBRIBUS INTERMITTENTIBUS,

*Quam*

Permifſu Gratioſiſſimæ Facult. Med.

IN ALMA LIPSIENSI

SUB PRÆSIDIO

D. AUGUSTI QVIRINI RIVINI,

publ. prop.

DAVID HEINRICUS Bellner/

Hering. Thur.

hor. locoq; confvet.

Ad diem II. Maji M DC LXXXIII.

---

LIPSIÆ

Literis JOH. GEORG.







## Præloqvium.

**E**st sanè tanta febrium varietas, ut qvi omnia in singulis febricitantibus obvia notare velit, maris guttas numerare, id est, rem omninò infinitam emetiri videatur. Utut enim ab artis nostræ primordiis ad hæc usq; tempora non deficiant, qvi observationes pene innumeras de iis collegerint, publicoq; communicarint; nondum tamen totum exhaustire licuit negotium, qvin adhuc plura superaddi qveant qvotidie. Tantum verò abest ab illa, multitudine & anomalia febrium nos confundi vel detereri, ut potius easdem intimius perscrutari gaudeamus, pulchra existimantes, qvæ ardua sunt. Cumqve intermittentes præ cæteris frequentius occurrant, ansam nobis dederunt easdem paulò accuratius examinandi; qvòd an ex voto præstitum sit, Tibi Lector Benevole, judicandum relinqvimus. Sistimus autem Tibi meditationes nostras qvatuor capitibus divisas: Primum Historiam Febrium intermittentium, Alterum earum sedem, Tertium causas, Quartum Curam tradit. Deus T. O. M. adsit nostro conatui, eidemq; benedicat ex alto.



# CAPUT I.

## Continens Februm intermittentium Historiam.

### §. I.

**Q**uæ communiter numerantur febres ad tres in universum classes redigi possunt commodè. Prima sit continentium, quæ unico cursu sine vlla exacerbatione & remissione absolvuntur altera continuarum, quæ continuo quidem durant, per intervalla tamen exacerbantur & remittunt; tertia intermittentium quæ periodicè definunt iterumque redeunt.

§. 2. Sepositis reliquis, ultimam saltem hanc vice classem considerabimus, in qua plurima intermittentium genera occurrunt, nempe quotidiana, cujus paroxysmus omni die redit; Tertianæ cujus paroxysmus tertio; quartana, cujus paroxysmus quarto die recurrit. Atque hæc febres fatis frequentes sunt: rariores sunt quintana, sextana, septimana, octana, nonana, decimana, quando febris, quinto, sexto, septimo, octavo, nono vel decimo die redit: similiter & menstrua, quæ singulis mensibus, & annua, quæ certo anni tempore redit. Egregia harum febrium exempla vide in Schenckii observat. fol. 746. seqq.

§. 3. Deinde quoque duplicantur & quandoque triplicantur, istæ febres. Quotidiana duplex dicitur, si quovis die (i.e. spatio 24 horarum) duo paroxysmi accendant; triplex, si quovis die tres paroxysmi observentur.

§. 4. Tertianæ duplex vocatur, non modo si tertia quavis die duplex paroxysmus accidat, sed &, si quando intercalares febre corripiantur fere ad modum quotidianarum. Distingvuntur autem hæc ipsæ à tertianis duplicatis hoc pacto: Paroxysmi quotidianarum omnes inter se conveniunt, at Tertianæ duplicatæ paroxysmo primo non respondet secundus sed tertius, secundo quartus, tertio quintus, quarto sextus, atque sic porro; e. g. vidi quæ die Lunæ hora septima matutina febricitabat sine frigore præcedente, cum insigni anxietate præcordiorum & siti, atque talis paroxysmus horas sex fortè durans eisdem cum symptomatibus revertebatur die mercurii, veneris, sabbati &c. Interea die martis, jovis atque Saturni multum dissimilis paroxysmus.



roxyfmus observabatur, siquidem horâ ordinariè nonâ ante meridiem cum horrore & vomitu accedebat febricula usque ad noctem durans, sed longè remissior. Post usum remediorum desierunt primum paroxysmi dierum imparium, remanente perfecta tertiana dierum parium, quæ paulò post quoque sublata est penitus.

§. 5. Duplicantur similiter & Quartanæ ita ut e. g. paroxysmo vix finito superveniat alius aut quod sæpius accidit, si paroxysmus diei primæ respondeat quartus, huic septimus &c. interim, quæ altero die supervenit febris, redit quinto, octavo, undecimo &c. adeoque non nisi tertius, sextus, nonus, duodecimus &c. à febre immunis est. Præterea si triplicetur hoc pacto quartana, tum certè omni die paroxysmus febrilis accidit.

§. 6. De Semitertiana jam nihil dicam quam ex tertiana & quotidiaua compositam volunt, ita ut omni die febricitet æger, at quovis die tertio duplicetur paroxysmus: cum enim in hac quotidianam statuunt continuam, satius est ad continuas referri semitertianam. Erraticas autem hic præterire non possum, quo nomine omnes insigniuntur febres, quæ omnino in certis ludunt diebus.

§. 7. Diebus dixi incertis recurrere erraticas; si quis enim horas attendere velit, tum certè in tertianis quoque & quartanis & quotidianis anomaliam non raro insignem deprehendet. Sunt enim quædam admodum regulares, quæ ordinariè vel in eandem horam incidunt, vel unam alteramve horam anticipant vel postponunt. E. g. si quis horâ matutinâ septimâ corripitur febre, fieri potest, ut alter paroxysmus & sequentes omnes reliquis diebus eodem tempore subsequantur; vel etiam, ut alter hora sexta, tertius quinta; vel ut alter hora octava, tertius nonâ superveniat. Hæ sunt febres perfectè regulares; Quod si verò alter paroxysmus hora forte quarta matutinâ, tertius pomeridianâ secundâ, quartus antemeridianâ octava sequatur, tum profectò febris minus est regularis, nondum tamen erratica; etenim si modo in diem ordinarium incidat, quotidianæ, tertianæ vel quartanæ typum adhuc servare potest.

§. 8. Sciendum interim est, febrem non semper eundem typum à principio ad declinationem usque servare. Solent enim febres primum erraticæ non rarò abire in quotidianas, tertianas vel



quartanas: hæ ipsæ verò inter se quoque commutantur, aut in duplicatas vel triplicatas, aut tantum non erraticas degenerant. Atque ideo non modo integer febris decursus, sed & in singulis paroxysmis quid accidat, observari debet. Etenim alia in accessione s. principio, alia in augmento, alia in statu, alia in declinatione paroxysmi notanda occurrunt.

§. 9. Rarissimum est, febris intermittens paroxysmum inchoari ab æstu atque cum frigore terminari; hujus tamen exemplum non tantum Hæferus in Herc. Med. p. m. 322. annotavit. Sed & Borrichius in Act. Hafn. Vol. III. pag. 7. Communiter autem omnes cum frigore atque horrore incipiunt, post sequitur calor præternaturalis, ac tandem cum sudore finitur paroxysmus. Quosdam vehementia frigoris per aliquot horas admodum urget, ut dentes strideant artusque contremiscant, æstum autem subsequenter vix attendunt. Alii econtra levi tantummodo vexantur frigore, æstus à calore intensissimo se postmodum ferme exuri clamitant. Nonnulli & frigoris & æstus tortura pene exanimantur: alii gradum utriusque longè mitiorem persentiscunt, atque his quidem hora una atque altera, illis sex, octo, duodecim & plures horæ paroxysmum absolvunt.

§. 10. Et sicuti intermittentes nonnunquam purè ardentes absque omni frigoris nota observantur, ita etiam dantur purè algidæ, in quibus ne vestigium quidem caloris febrilis apparet. Rarius autem ejusmodi febres decurrunt, quin post aliquot paroxysmos frigus ardentibus & æstus algidis sese associet; æstus in declinatione intermittentium nunc saltem levioris frigoris, nunc verò caloris minus molesti, vestigia relinqui, quotidianum est.

§. 11. Ecquid verò de historia sequente sentis? Erat fæmina, quæ ad modum tertianæ alternis diebus horâ pomerid. quartâ insignes cardialgias cum crebriori vomitu biliosæ ac tenacis materiæ patiebatur, atque hic paroxysmus ad noctem usque perdurabat absque omni tamen vel frigoris vel æstus nota, viresque desiciebat cum appetitu ut vix intercalari die lectum deferere potuerit ægra. Post usum convenientium remediorum vomitus primum & tandem anxietas præcordiorum cessavit in totum paroxysmo fortè septimo. Elapso deinceps octiduo, cum in forum egressa brassicam muriaticam assumeret  
jejuna



jejuna, accidit, ut ad horam usque pomerid. quartam stomachus do-  
leret, tumq; cum vomitu tertiana inchoaretur perfecta, frigore non mi-  
nus quam æstu satis molesta per tres ferè septimanas.

§. 12. Jam quæritur, utrum antecedens affectus ad tertianam re-  
ferendus sit, nec ne? Respondeo quod sic, distinguendo tamen inter fe-  
brem latitantem in fieri & jam factam manifestamq;. Licet enim undi-  
que in intermittentibus frigus atque calor aut saltem horum alterutrum  
occurrat, nihil tamen obstat, quo minus tarda quarundam febrium ha-  
beantur initia, prout aliarum decrementsa sunt, quæ horas febriles ulti-  
mas ordinariè lassitudine artuum, cephalalgia, cum anorexia, citra omnem  
æstus frigorisque accessum notare solent.

§. 13. Igitur ad frigus æstumq; respiciendum quidem in inter-  
mittentibus, æst non unicè iis inhærendum est. Sunt enim adhuc pluri-  
ma & quidem maximè urgentia symptomata, quæ & febrem ipsam &  
curam ejus difficilem reddunt. Multi immensis cruciantur doloribus,  
capitis, dentium, cordis, stomachi, splenis, abdominis, dorsi vel artuum:  
quidam hæmorrhagiis, vomitu, alvi fluxu, vel sudoris profluvio ener-  
vantur. Nonnullis sputatio continua vel crebrior mictio, tussis, sitis,  
fames, nausea vel anorexia molestiam infert non levem: alii lipothymias  
patiuntur, vel delirant, aut tument hydrope, aut purpura vexantur vel  
scabie. Ut taceam in muliebribus non infrequenter accidere mensium  
suppressionem, passiones hystericas, periculum abortus, lactis defectum,  
mammarum ulcera &c.

§. 14. Hæc atque similia symptomata non minus quam erro-  
res in Diætâ, medicamentorum neglectus vel præposterus usus febrem  
ipsam multum prolongare possunt. Et quamvis intermittentibus in ge-  
nere certus terminus non sit statutus, ita ut & quotidiana & tertiana &  
quartana quandoque una alterave septimana terminentur, quandoque  
verò ad aliquot menses imò & annos excurrant; nihilominus ubi in con-  
suetudinem jam abiit febris, tunc sanè non absque tædio & scandalo in-  
telligit Medicus, febrem nunc remittere, nunc iterum exacerbari, nunc  
verò penitus intermittere, ac paulò post redire, data levissima occasione  
træ, terroris, frigoris &c. Sed pergendum est ad

CAP.



# CAPUT. II.

Continens

## Febrium intermittentium sedem.

§. 1.

**H**Astenus omnes conveniunt Autores in recensenda febrium intermittentium historia; ubi verò de earum sede, causisque movetur quæstio, tum sanè dissensus oritur non levis. Nimirum traditum erat à Galeno lib. 1. de febr. diff. cap. 1. & 2. febrem nunc occupari spiritus, nunc humores, nunc partes solidas; plausibile igitur ejus sectatoribus videbatur, in Ephemeris spiritus, in putridis humores, in hæctici partes solidas affici: cumque putridis intermittentes annumerarent hinc factum est, ut pro diversitate febrium diversos quoque humores putrescere crederent.

§. 2. Ex innumeris videri potest Hor. Augenus. Lib. 5. cap. II. de febr. quomodo à pituita quotidiana, à bile flava tertianæ, ab humore melancholico quartanæ nascentur, cujus rei rationem Hœferus in Herc. M. p. m. 354. reddere conatur inde, quod in homine major sit pituitæ copia, quâ putrescente fiat quotidiana, minor quantitas bilis, hinc tertiana altero die moveri, & quia melancholici humoris adhuc minor quantitas, hinc putrescentem illum circuitus adhuc tardiores habere.

§. 3. Quandoquidem verò pituitam potissimum in stomacho coacervari, bilem in hepate, melancholiam in splene statuerent; proinde non dubitavit Sennertus L. 2. cap. 2. de febr. sedem quotidianarum stomacho, tertianarum hepati, quartanarum lienì adscribere. A quo parum discedit Riverius cum Fernelio, quando non tantum viscera jam nominata sed & diaphragma & pancreas & omentum atque mesenterium insimul accusant, quod in hac prima regione, tanquam publici corporis sentina omnis confluat humorum colluvies, ut loquitur Fernelius L. 4. de Febr. cap. 10. p. m. 486.

§. 4. Aliter sentit Fr. de le Boe Sylvius Lib. 1. Prax. med. cap. 30. & cum eo Regn. de Graaf cap. 2. de succo pancreatico p. 630. & sequens utpote qui inter viscera quidem unicum pancreas peccare, causamque febrium



febrium intermittantium continere docet; interim tamen plura simul humorum vitia præsupponere videtur, nempe pituitam viscidam ramificationes ductus pancreatici obstruentem, deinde succi pancreatici inter stagnandum contractam aciditatem, ac tandem bilis cum succo pancreatico effervescentis acrimoniam plus minus oleosam.

§. 5. Maluit autem Willis, ne quis in corpore humor intactus relinqvatur, chylum potius cum sanguine vitari. Etenim in Cap. 3. & seqq. de Febr. aperte tradit, succum nutritium ex esculentorum materia suppeditatum, cum ob discrasiam sanguinis, nunc acris atqve retorridi, nunc acidi atq; austeri, aliisve modis vitiatum minime assimilatur, ad plenitudinem in vasis congestum, propter sui expulsiōnem turgescētiā inducere febrilem.

§. 6. Ita quidem de sede causæ febrilis, s. ut aliās dicitur subiecto radicationis sentiunt. Porro, quod subiectum inhæsiōis s. partem in febre affectam concernit, in eo determinando ferè omnes conspirant, dum in febribus intermittētibz cor potissimum ac postea reliquum corpus universum affici existimant.

§. 7. Quamquam enim calorem præternaturalem juxta veteres ex humorum putredine, juxta Recentiores ex eorundem effervescētia oriundum, diversis in locis, puta stomacho, intestinis, pancreate, hepate vel splene nasci, credant, consentiunt tamen in hoc, quod statuant, omnem istum calorem primum cordi communicari, unde tanquam è fonte caloris pulsu accelerato diffundatur ad cunctas corporis partes.

§. 8. Verum plura obstant, eaq; non levis momenti argumenta, quæ jam recensitas de subiecto ac sede febrium opiniones omnino diruunt. Nempe primò divisio febrium in Ephemeraz putridas & hæcticas malè à subiecto seu parte affecta desumitur, siquidem in omni febre & spiritus & humores & partes solidæ afficiuntur, quamvis non semper eodem modo, ut postmodum docebo.

§. 9. Quod intermittētes in specie concernit falsum est, in quotidiana pituitam præcisè, in tertiana bilem flavam, in quartana humorem melancholicum peccare. Nec difficile foret innumeras Autorum observationes adducere, nisi quotidiana experientia ad oculum demonstraret, pituitam in tertianis pariter & quartanis, bilem fla-



vam in quotidianis & quartanis, atram bilem in quotidianis etiam ac tertianis omnino abundare. Ut taceam in una eademq; febre jam dictos humores omnes non semel concurrere.

§. 10. Adhuc observamus interdum, febrem intermittentem in iis etiam, ubi ejusmodi humorum vitia non occurrunt; & quos quæso humores accusabimus iis in febribus, quæ vel quotidie multiplicantur, vel etiam tardiori cursu, quinto, sexto vel septimo die, vel saltem singulis mensibus aut certo anni tempore redire solent.

§. 11. Par est ratio Viscerum. Videlicet non inficior, interdum vel stomachum, vel hepar aut lienem vel etiam pancreas in febribus pati; at verò in quotidianis stomachum, in tertianis hepar, in quartanis splenem aut undique pancreas damnare velle, absurdum. Quis enim tota die non deprehendit, stomachum pene undique in omni febrium genere affici, ac non minus lienem in quotidianis ac tertianis, quam hepar in quotidianis & quartanis, verbo: viscera omnia promiscue in intermittentibus corrumpi. Confer Boneti sepulchretum pag. 1421. & seqq.

§. 12. Deinceps qui in pancreate sedem intermittentium quærent, eorum hypothesis nititur fundamentis nondum satis probatis: etenim adhuc demonstrandum est, succum pancreaticum in istiusmodi febribus esse acidum, bilem itidem esse alcalinam ita ut exinde effervescentia frigida non minus quam calida oriri queat, & quidem hæc omnia ita sese habere in omnibus febre correptis.

§. 13. Ecquis vero chylum seu succum nutritium accusare poterit, ubi sæpe cibum potumq; omnem detestantur, aut statim vomitu reddunt ægri; ubi nullus digestionis locus: Ne dicam rationem periodorum nullatenus hinc reddi posse, cum nonnulli ægrorum horis quidem consuetis prandio cœnaq; utantur, febrem tamen patiuntur omnino erraticam, aut saltem redeuntem incertis horis; quemadmodum alii cibum potumq; assumunt tempore admodum incerto, paroxysmo in eandem semper horam recurrente.

§. 14. Denique nec ii omni ex parte audiendi sunt, qui cor primario in febribus affici contendunt. Etsi enim vel iis maxime concedamus cor primum calorem febrilem sustinere, atq; hinc tanquam è fonte caloris eundem ad reliquas partes distribui, quod quidem



dem adhuc satis dubium est: hoc tantum mihi velim explicari, quomodo se cor habeat in febribus purè algidis, item è quonam fonte frigus tum satis notabile diffundatur in corpus.

§. 15. Igitur ut constet, quid de parte affecta in febribus mihi videatur, moneo ante omnia, quod supra indigitavi, nullam partem corporis excludi, quin aliquando patiatur in febre. Profectò dolores capitis, dorsi artuum, abdominis, præcordiorum, cordis ipsius ac reliquorum viscerum non rara sunt: Hæmorrhagiæ, profluvium sudoris, salivæ atque urinæ vitia satis humorum errores, sicuti deliria, virium imbecillitas, jectigatio, ac tremor artuum spiritus animalis morbosum statum probant.

§. 16. Inter has autem partes alia est subjectum morbi ipsius, alia causæ morbificæ, alia symptomatis cujusdam. Nam e. g. qui cephalalgiam in febre tussiculosa patitur, huic caput saltem symptomaticè & per consensum dolet, quatenus inter tussendum vehementius concutitur: pulmones verò subjectum sunt ipsius tussis, tum ab acrimonia & visciditate sanguinis continuo irritantur: sed stomachus, qui ejusmodi vitiosos humores fovet, subjectum est causæ morbificæ.

§. 17. Porro alia pars afficitur primariò, alia secundariò: Ubi quidem non intelligo ordinem febris oriundæ, juxta quem nonnunquam præcedit vitium partium solidarum, nonnunquam humorum, nonnunquam spirituum. E. g. qui febre vulneraria corripitur, vel ob vulnus vel luxationem, in eo certè pars solida primum afficitur dein & spiritus atque humores. Cui vero ob contractam acrimoniam seri febris catarrhalis accidit, in eo humores primum, dein spiritus ac partes solidas corripì manifestum est; Spiritus autem primum peccare in aliis, docent exempla eorum, qui saltem ex fortiori impressione vel commotione spirituum nimiam febrem incurrunt, ac postea humorum simul & partium solidarum vitiis vexantur.

§. 18. Enimverò id probè observari velim, vitia quidem humorum atque partium solidarum interdum febrem præcedere, aut febrem ipsam non nisi in spiritibus inchoari. Videlicet vulgo notum est, plures quidem scirrhum lienis ulcera pulmonum atque renum, similesque viscerum corruptiones diu tolerare, alios cruditates acidas per plures annos in stomacho gestare, alios cruditatem pituitosam



tosam & nidorosam ; donec forte occasio Idæ febrilis superveniat.

§. 19. Et ne quis amplius humorum ac partium solidarum vitia pro subiecto adæqvato febris habeat, urgeo, non tantum illa ipsa sæpius occurrere sine febre ; Sed & in multis subiectis vel enasci in febre ipsa, vel etiam febre jamjam finitâ subsequi tanquam productum morbosum. Profectò rarum non est in febribus ex æstibilem, ex debilitate stomachi pituitam viscidam colligi, si aliquandiu febris duraverit, quantum nihil horum in principio observatum sit ; ac memini ab assumpto vomitorio in principio tertianæ nil quicquam rejectum fuisse, præterquam sola juscula superingesta ; elapso autem octiduo cum repeteretur idem emeticum, tantam saburram ac copiam pituitæ bilisq; evomuit idem æger, quantum vix stomachi capacitas continuisse videbatur.

§. 20. Corrumpuntur similiter & partes solidæ in febribus ; nam & ii, qui ante invasionem febris perfectâ sanitate fruebantur, sæpenumero, si diutius malum perseveret, obstructions viscerum, dolores ac scirrhus lienis, epatisve experiuntur, alii Phthisin & exulcerationem pulmonum &c. Insigniter quoque hallucinantur qui cum ejusmodi viscerum vitia deprehendunt in cadaveribus defunctorum, eadem pro causis febrium venditant, quæ tamen plerumq; in morbo ipso enata sunt.

§. 21. Etenim si causa febrium continens fuerit ejusmodi vitium partis cujusdam solidæ vel etiam humorum, certè febris nunquam cessaret, nisi id ipsum sublatum fuerit. Jam verò febre etiam finita Phthisis ; scirrhi lienis atq; hepatis remanent in nonnullis, sicut in aliis sudores nocturni, tabes vel cachexia, tumor pedum œdematosus, hydrops. Ergo finaliter concludo : febris radicaliter & primariò nec in humoribus, nec partibus solidis residet. Quomodo vero in ipsis spiritibus febres habitent, nunc dicam in sequentibus.

## CAPUT III.

### Continens



# Febrium intermittantium

## Causas.

### §. I.

**S**I, quæ in sensus maximè incurrunt, causas febrium intermittantium scrutamur, varia quidem occurrunt: Frigus aëris ambientis, æstus radiorum solarium, cibus potusq; insalubris aut nauseosus, ira, terror, mœror, amor, commiseratio, ut & dolor ex contusione, luxatione aut vulnere natus &c.

§. 2. In febre autem intermittente, cum tria præcipuè, sepositis aliis symptomatibus, obviam veniant: nempe frigus, æstus & typus seu paroxysmorum ordo, itaq; in rationem eorum & quo pacto à causis istis enasci queant, inqvirendum est.

§. 3. Equidem de ira, terrore, hisque ita dictis animi pathematibus nemo unquam negare poterit, ab iisdem immediatè & primariò affici spiritus animales; attamen de frigore æstuque, erroribus Diætæ, ut & contusione, luxatione & vulnere non æq; id manifestum est. Nihilominus qui considerat, horum omnium vim in alterando corpore nostro potissimum in eo consistere, quod Archeus seu spiritus vitalis insigniter ab iis afficiatur, vel per modum doloris, vel nausææ atque horroris, is nec dubitare poterit de ratione connexionis s. modo, juxta quem frigus vel æstus, aut uno verbo; febris exinde oboriatur.

§. 4. Quod si enim primò frigus, prout nobis accidere solet in febribus, examinamus; constat id ipsum non esse extraneum, sed omninò internum, quoniam & stragulorum, & hypocausi, & radiorum solarium summus calor nullatenus id impedire potest. Deinde causam habet internam non tam positivam, quam privativam, nempe defectum spirituum, prout in Dissertatione de Spiritu hominis vital. C. II. §. 16. declaratum est. Sic enim extinctio per mortem Spiritu cadavera summè frigent: in senibus & qui morbis diuturnis enervati sunt ex insufficientia Spirituum extrema frigent: ex retrocessione Spirituum subitanea totum non rarò corpus friget in Lipothymiis; & certè in febribus curiosum est, in accessu frigoris non tantum omnes vires quasi evanescere, sed & horrorem instar aquæ frigidae per dorsum magis ascendere, quàm descendere, manifesto argumento, quod frigus sequatur retrocessionem spirituum.



§. 5. Ecquis vero ignorat similem omnino horrorem interdum accidere v. g. ex relatione horrendi facinoris, aut visu spectri, ubi nil quicquam nobis contingit, quàm quod ab ideâ abominabili per sensus conceptâ Spiritus commoveatur. Ad eundem planè modum Spiritus commovetur in frigore febrili: ponamus enim ex cruditatibus ventriculi, assumptave re nauseosâ febrem gigni, in hoc sanè casu apertum est, deserì â Spiritu stomachum ob nauseam contentorum. Qui frigidum potat, aut in flumen se conjicit æstuante corpore, occasionem jam præbet feбри, quatenus spiritum repellit vel è ventriculo, vel ambitu totius corporis: Paucis quicquid spirituum retrocessionem urget, frigus febrile potest producere.

§. 6. Ab hoc Spirituum regressu, quæ à frigore oriuntur symptomata, facile licet deducere: pallor faciei labiorum ac ungvium livor, quid aliud indicant, quam defectum Spirituum, ob quem sanguinis color floridus perit, ut & cadaveribus exanimatis sæpenumerò simillimi sint ægri. Idem testatur ipsius cordis, de quo maximè conqueruntur ægri, uti & pulsus languor, & quam supra innui virium imbecillitas, ob quam ne pedibus insistere aut quicquam præstare valent, sed unice selecto & quieti tradere necessum habent. Nec enim alia est ratio ipsius ponderis, quod imminente febre artubus quasi appendi videtur, quàm quod Spiritus iis ritè gubernandis sint impares; siquidem nil planè demonstrari, ne dum concipi potest, quod realiter ac mole sua manus pedesque gravare queat.

§. 7. Audio hic eqvidem non paucos cum Sylvio atque Willisio causam frigoris febrilis quærere in acido, partes nervosas pungente ac vellicante; Sic enim apertè Willis. cap. 3. de febribus p. m. 82. asserit, verâ & genuinam causam frigoris & rigoris esse succum nutritium crudum, qui insignem acorem contrahens, eumque nitrosum, Spiritus vitales a core suo obtundat, caloremque obruat nativum, atque cum sanguine distributus ad partes sensiles, irritando corpora nervosa in tremores cieat. Sylvius autem L. 1. c. 30. §. 77. & seqq. succum istiusmodi acidum potius ex pancreate adducit, quem juvante simul pituitâ viscidâ opprimere putat admodum inertem bilem in duodeno occurrentem, ita ut exinde factâ effervescentiâ non naturali, sed potius frigidâ, halitus acidi ad cor, pulmones, caput, habitum corporis & artuum extrema distribuantur, Autores omnium, quæ in frigore febrili accidunt, symptomatum.



§. 8. Verum respondeo hic primò in genere malè accusari acidum in febrili frigore, quòd viderim & acidum defecisse in ejusmodi febre, & contra acidum præstò fuisse in ardentibus. Nempe si ex iis quæ vomitu rejiciuntur argumentari licet ad qualitatem eorum, quæ in ventriculo continentur, observavi aliquoties non nisi purè acida absq; omnibile fuisse rejecta per os, ubi tamen non frigus, sed æstus admodum vexaret ægros. Vicissim evomuerunt alii meram bilem eamq; flavam atq;ve copiosam in ipso accessu febrili, cum totum corpus horrore febrili contremisceret. Unde non difficulter apparet, ab acido frigus non produci per se, sed necessariò ab alia causa id deducendum esse.

§. 9. Particulariter autem ad Angli opinionem regero malè confundi acida cum nitrosis. Nec enim Spiritus acidus est in ☉o, qui refrigerat sed ejusdem ☿, prout experiuntur, qui loco ☽i Spiritum ejus adhibent in febrium cura. Quamquam enim acida quoque interdum vim refrigerandi habeant per accidens, quando v.g. cruditatem nidorosam è ventriculo extergunt in febribus ardentibus, in se tamen nullo modo refrigerant. Notissimum est vulgò ante Paroxysmum intermittentis cochlearia duo aceti, sp. vin. & ∇f. assumi, sæpe optimo cum successu; at verò si ab acido excitaretur frigus, nunquam locum haberet acetum.

§. 10. Nec Batavo condonare possum quòd acidum illud Pancreaticum sub forma halitus ex intestinis abire ad omnes partes velit. Mirum etenim foret in artuum extremitatibus primum observari frigus; cum breviori viâ ad nasum v. gr. partesque magis vicinas devenire queat. Et ponamus febre particulari partem quandam corripì e.g. brachium dextrum (qvalem historiam lectu dignissimam Cnœffelius Anno III. M.N.C. obs. 205. p. 381. memorat) tum certè viam mihi monstrari peterem, nec non rationem, quâ ex abdomine, cæteris partibus intactis, vapor istiusmodi febrilis acidus ad brachium deveniret.

§. 11. Paulò aliter de naturâ frigoris febrilis sentit Cartesius part. I. Epist. p. 101. utpote qui humorem vitiosum in mesenterio aut alia corporis parte collectum, postquam fluorem adeptus sit, ope venarum existimat deferri ad cor, ubi incalescentiam ac rarefactionem sanguinis impediât primum, postea æstum concipiat intensissimum ad instar viridis ligni, quod igni adjectum in principio eundem extingvere videtur, ac tandem, probè accensum, flammam acriorem emittit. Quandoquidem verò fundamentum hujus opinionis falsum sit, & quem supponit ignem



in corde vitalem ac indè factam sanguinis incalescentiam & rarefactionem, nunquam satis probare queat, hinc & sua sponte omnia, quæ superstructa sunt, corruunt.

§. 12. Propius ad meam hypothesein accedit Helmont. c. 9. de febr. p. m. 766. quando rejectis humoribus vitiosis in Archeo febrium causam querit. In explicanda autem ratione frigoris minus felix est, quando id ipsum, ægris tum accidere putat, cum Spiritus humorem excrementitiū parti similari adhærentem per tremulos rigores excutiat, si cuti aranea telas suas conqvassare solet, ut rejiciat, si quid peregrini in eas fortè inciderit. Scilicet quam credit commotionem spirituum, ea nulloatenus concipi potest nisi cum æstu, utpote quem ignea eorum natura urget. Allata igitur similitudo huc parum quadrat, siquidem non activè, sed potius passivè tunc se habet Spiritus animalis, quando in frigore non tam fugat hostem quam fugit, & ut supra demonstravi, rationem causæ præ se fert magis deficientis quam efficientis.

§. 13. At vero in æstu rectè sentit Helmont. Archeum velut iratum excandescere non alio fine quam ut expellat hostem sibi nocivum. Nempe certum est, calorem animalium naturalem à principio quodam vitali descendere, quod alias Spiritum dixi vitalem. Hic ipse verò cum vera igneus sit, calorem quidem moderatum, si debito modo influat, in corpore gignit, aut si velocius commoveatur atque copiosius influat, quid quæso aliud, quam æstum intolerabilem creare potest.

§. 14. Etenim si ea contemplamur, quæ æstum febrilem excitare vel etiam augere solent, imò & ipsa symptomata, tunc occurrentia satis liquet, calorem istum non nisi à Spiritibus provenire. Nempe præmò quæ occasionem præbent fervori præternaturali sunt potissimum iracundia, commotio corporis vehementior, æstus aëris ambientis, vini abusus atque tandem vitia humorum atque partium solidarum. Ira quidem in se inspectetur, nil aliud est, quam subitaneus ac fervidus Spirituum motus unde oculi quasi scintillant, vultus candet, cor palpitat, totumque corpus æstuat cum insolito virium augmento, ac sæpe accidit, ut cum reliquis humoribus bilis quoque commoveatur sensibiliter.

§. 15. Pari ferè modo omnia turbantur in corpore humano si quis fortius sese commoverit saltando, currendo, equitando, digladiando &c. ac notatu dignissimum est, viribus defatigatis exhaustisque f



mino tamen vix esse locum ob inquietudinem Spiritibus Impressam. Hæc itaque nisi sedetur quantocius, jamjam initium dat febrili æstui, non secus ac vindictæ cupiditas in ira.

§. 16. Porro calorem præter naturalem accendunt, æstus ambiens radiorum solarium vel balnei, item ingurgitatio immodica vini &c. Dum enim tales particulae igneæ vel per cutis poros, vel inter inspirandum admittuntur, aut cum potu generoso assumuntur liberalius, exagitant dubio præcul non sanguinem tantum, sed & Spiritus vitales summè mobiles.

§. 17. Tandem verò æstum quoque excitare possunt, quæ præter naturam partes solidas vel humores afficiunt, vulnus, calculus, impuritates sanguinis &c. Videlicet calculus, & in genere, quæ dolores gignunt, uti ex spina digito infixâ manifestè liquet, inflammationi ansam præbent, quatenus vellicando fibras sensiles Spiritus alliciunt, ad causam doloris ejiciendam paratos. Atque in tali casu æstus primum particulariter in hoc vel illo membro deprehenditur, ubi verò dolor iste vel diutius duret, vel vehementius urgeat, adeoque negotium facesset spiritibus, tùm factò impetu conjunctis viribus in vindictam ruunt, ita ut excandescencia eorum totum corpus quasi accendere videatur.

§. 18. Hoc pacto ingens interdum æstus circa præcordia observatur in principio quarundam febrium, quod in ventriculo morbi, ut sic loquar, spina hæreat. Exindè verò ubi vitiosus humor ad M. Seam deferatur, per totum corpus calor diffunditur, dum Spiritus hostem admissum undique persequuntur, nec cessant, quemadmodum aliàs in eruptione Erysipelatis, variolarum, morbillorum, purpuræ &c. cernimus, donec vel molestus hospes iterum ejectus, vel Spirituum robur defatigatum fuerit.

§. 19. Possem varias adhuc occasiones æstus febrilis adducere, e. g. Dentitionem, infantibus exosam; curas atque mœrorem summâ cum anxietate conjuncta, vigiliam diuturnam &c. nisi omnes ad unum collimare punctum videantur. Eò enim res redit, ut æstum febrilem suscitare soleant, quæcunque Spiritum vitalem commovent vehementius.

§. 20. Et quemadmodum plures quandoque causæ in uno subiecto concurrunt ad excitandam febrem: ita non rarò factus jam morbus



bus etiam mitior, exacerbatur supervenientibus ejusmodi erroribus. Videant alii, quâ ratione & quo cum successu agrum in febre ardente stragulis æstuque fornacis excrucient, ne dicam suffocent, & quàm infauftum ex vini potu solamen afferant. Certè qui accuratior est in animadvertendis febricitantium alterationibus, id quoque observabit, nec artuum lotiones vino adornatas, nec epithemata cordi vel carpi manuum applicata ex aquâ carbunculi, apoplectica, similibusque spirituosiss & aromaticis absque detrimento adhiberi posse, quin & ab his calor intendatur insigniter.

§. 21. Multò magis id elucescit si ejusmodi Spirituosa aromatica & volatilia pro usu interno præscripta fuerint sine judicio. Novi non unum, qui intermittentem in continentem febrem commutavit, solo abusu Tincturæ bezoardicæ: qui essentiam absinthii atque febrilem, ad mortem usque continuavit, non alio cum effectu quàm ut de Die in diem febris exasperata sit: qui Spirit. sal. amm. atque C.C. chinam cum pipere assumerunt ad nauseam usque majori cum damno quàm emolumento.

§. 22. Sed pergendum est ad symptomata in æstu febrili obvia: ubi profectò luce meridianâ clarius est, à Spirituum impetu & commotione præternaturali ea omnia, quæ tum accidere solent, oriri, nempe inquietudinem, Agrypniam, deliria, palpitationem cordis pulsumque celeriores atque hæmorrhagiam. Quis enim non intelligit injectione motorem Archeum esse inquietum, quandoquidem nec manus pesve, aut ulla alia pars moveri potest absque illius principii vitalis influxu. Ita & Agrypnia, quæ non modo in ipso æstu, sed & ante paroxysmum observatur, aliunde non est, quàm à continuo Spirituum motu, propter quem nec consuetam capere possunt quietem. In deliriis clarior adhuc res est, quippe quorum actus universi, imaginationes phantasticæ absurdè dicta & facta, inepta pariter & atrocia nil aliud, quàm confusionem idearum, tumultuationem & uno verbo errorem Spirituum insignem indicant. Cordis palpitatione pulsusque celer ac vehemens, unde nisi à rapido Spirituum influxu.

§. 23. Non ignoro esse, qui ut omnem æstum febrilem, ita & sanguinis motum acceleratum nec non hæmorrhagias ab effervescentiâ quadam deducere conantur. At sciant sanguinem propriè nullam isti-



usmodi effervescentiam sustinere, quoniam falsa, ad quæ M. Sea pertinet, non effervescent ob jam factam salium unionem. Si quæ igitur ebullitio accadat, ea non tam à salinarum particularum concursu & pugna, quam orgasmo Spirituum petenda venit.

§. 24. De siti quoque non obscurum est, eam ab eadem produci principio, siquidem ob auctam transpirationem in æstu febrili lymphæ necessariò imminuitur, ac proinde mirum non est, si ex ejus defectu ariditas lingvæ, & salivæ vel salsedo aut visciditas glutinosa nascatur, & consequenter sitis insatiabilis. Anorexiam, tremorem artuum, capitis dolorem pulsantem, & si quæ sunt alia à Spirituum motu anomalo ac tumultuario enata nunc non attingam, cum ad doctrinam de febrium periodis mihi progrediendum sit.

§. 25. Nimirum superest, ut videamus quamobrem paroxysmus febrilis desinat, ac iterum redeat, & quidem tam certa interdum periodo, qualem horologium vix æque accuratè servare solet. Igitur quod paroxysmi finem attinet, plures quidem credunt eum tunc demum imponi, quando materia morbifica, sive corruptus humor, à natura superatus exhalaret in æstu. At verò qui die etiàm intercalari, vel vomitorium, vel venæsectionem adhibet, clare deprehendit, ventriculum non minus quàm M. seam tali abundare humore vitioso, qualem in febre accusare solent. Mihi proinde verosimilius videtur, febrem non tam remittere ob defectum causæ morbificæ, quam propter Spirituum lassitudinem ac insufficientiam.

§. 26. Ut autem appareat, quo pacto intermittentibus certa contingat periodus, adducam unum alterumve exemplum, quod mihi fortè notare licuit. Studiosus quidam Hamburgo natus, cum quondam petasone sibi à Parentibus missum pro jentaculo assumeret per aliquot dies, dolores primùm stomachi atque capitis cum dejectione appetitus sensit usque donec febris superveniret, quotidie horis illis matutinis recurrens, ægrumque ad feram usque vesperam affligens.

§. 27. Aliustum mihi domesticus, cum data occasione die Sabbathi sese largius exsatiasset caseo, quem vulgò vocant Hollandicum, atque simila, sensit similiter dolorem capitis atque stomachi, ita ut die illa præter solitum fame deficiente prandium detestaretur. Die sequente Solis Templum visitandum fuit, adeoque proximo die Lunæ



idem repetere jentaculum placuit, quamvis infelici cum successu, si-  
quidem ab illâ statim die febris tertiana incepit admodum vehemens.

§. 28. Porro accidit civi cuidam nostrati ut à socero suo ad  
cœnam invitatus die visitationis Mariæ, quæ Festivitas Anno isto 1679.  
in diem Jovis incidebat, inter comedendum crines casu illapso reperiret  
in cibo, cumq; oborta nausea, nihilominus ad escam sibi abominabilem  
capiendam urgeretur, factum est, ut ilicò de stomacho conquestus do-  
mumq; reversus à vomitu sibi temperare non potuerit. Postquam autem  
proxima Dominicâ pro more iterum invitaretur, statim memor istius rei  
eandem passus est nauseam, ita, ut summo fastidio cœnaret, eademque  
nocte febrem inchoaret quartanam.

§. 29. Alius sanguine mihi conjunctissimus simili quartana  
febre correptus est, occasione aëris frigidi ac pluviosi. Scilicet intere-  
rat Solennitatibus funebribus, cumq; imber ex improvviso Exequiatores  
in deductione funeris deprehenderet, agrè ferebat vestimentorum udo-  
rum frigus, præsertim quod ad justa funeri persolvenda in templo Pau-  
lino adhuc diu commorandum esset. Accidit autem, ut quartâ abhinc  
die eandem ob causam eò deveniret, locique illius conditio seu halitus  
ingratus horrorem primò levem excitaret, ac postmodum febrem satis  
diuturnam.

§. 30. In his autem casibus idem contingere videtur, quod  
iis, qui una atqve altera die somnum capeſſunt meridianum, ac postmo-  
dum diebus sequentibus in eundem etiam nolentes relabuntur; vel qui  
excitati circa auroram, etiam non moniti postmodum expergiscuntur;  
vel qui certum prandio cœnæq; tempus consecrarunt, adeoque auditâ  
hora famem vix amplius tolerare valent.

§. 31. Quotusquisque verò inficias ibit, tantas esse vires con-  
suetudinis, ut & jam enarrata, & plura quoque majora præstare queat.  
Sed quid aliud est consuetudo quam certa quædam Idea Spiritibus per  
actus repetitos impressa?

§. 32. Rectè Willis in Anim. Brut. pag. 133. ubi de somno lo-  
quitur, vim consuetudinis Spiritibus s. animæ sensitivæ adscribit & quod  
ibidem adducit exemplum notabile non possum huc non transferre.  
Nempe Morio erat, qui adeò attente observans horologii cursum, quo-  
tiescunque campanæ sonitus audiretur singulos ictus, alta voce numera-  
bat



bat semper; evenit postea à diuturna imitatione, ut mensura quasi horarum, spiritibus impressa, non minus accurate quam ullum Automatum indicaret temporum intervalla; & quod ridiculum est, bombis (in quibus reddendis admodum felix fuit) emetiretur ac imitaretur pulsus horologii, hoc etiam silente.

§. 33. Est enim Spiritibus connata facultas non modo percipiendi, sed & retinendi ideas sive species rerum objectarum, juxta quam ea, quæ memoriâ tenemus repetere licet, quandocunque placitum est, ita ut dormientes etiam ac inviti recordemur antea factorum, visorum, dictorum &c. imò quod maximum est, servemus interdum Ideas harum rerum non ad horas aliquot vel dies, sed annos plures, imprimis si fortius impressæ fuerint.

§. 34. Quod si verò hæc ita se habeant neminem mirari subeat, si idea quoque morboſa febrilis, in specie frigoris atque æstus, ubi semel recepta est, sua sponte iterum se sistat, etiam si de ea ne quidem cogitemus. Id saltem dubium est, quomodo præcisè in hanc vel illam horam incidat, & quamobrem non aliquoties una die, & inordinate redeat prout v. gr. idea rei visæ, placentis pariter ac displicentis, nonnunquam & inter meditando, obambulandum, cibandum, orandum atque dormiendum, renovatur & continuo quasi obversatur oculis.

§. 35. Propterea notari velim primò, non omnes intermittentes esse regulares atque ordinatas, sed & irregulares atque erraticas dari, & quemadmodum febres multæ ab initio inordinatæ sunt, ac postmodum in perfectam transeunt quotidianam, tertianam, vel quartanam, ita etiam ordinem maximè regularium interrumpi posse variis modis.

§. 36. Deinde quoque tenendum est, ad periodum regulariter intermittentium plurimum conferre imaginationem phantasticam & metum. Videmus enim animosiores & qui parum æstimant insultum febrilem vix recidivam pati, at econtra, qui imminente hora ob metum redeuntis febris jamjam contremiscunt, longè difficilior à febre liberari.

§. 37. Id egregiè illustrat exemplum cujusdam studiosi, qui audita hora decima antemeridiana ordinariè paroxysmo tentabatur febrili; cum enim varia in cassum adhibuisset medicamenta, tandem secum constituit, alia methodo uti, febremque per commotionem corporis



ris expellere. Eqvo igitur insidens peregrè sibi abeundum duxit, sed ecce, dum nihil metuens ædibus sacris juxta viam exstructis appropinquat, campana, & quidem errante horologio, decimam sonat, hinc perterritus solitâ febre corripitur, ut non nisi summa cum difficultate cursum absolverit propositum. Quapropter cautior factus idem remedium tentat alio tempore, utqve horologii pulsus evitaret, per loca devia evitat, donec paroxysmi tempus præterlapsum esset ex toto; tum verò hilaris in diversorium se recipit atqve ab illo tempore liber à febre atqve immunis est.

§. 38. Spectat huc quoqve fœmina, quæ his diebus curæ meæ sese concredidit. Visitaverat ea quandam ex amicis honoris gratia, & fortè inter confabulandum canis accedit vomitu enormi pavementum fœdisimè conspurcans. Exinde verò tantam hæc fœmina, gravida quidem sed hætenus perfectè sana, nauseam contrahit, ut vix à vomitu potuerit abstinere: domum igitur reversa reddit per os, quæ monente pudore detinuerat non sine anxietate, tumque supervenit frigus cum insequente febrili calore, cephalalgia, appetitus dejectione, inquietudine ac dorsi doloribus. Quoniam autem paroxysmus hic febrilis elapsis ferè viginti quatuor horis, post usum medicamentorum terminabatur, occipit statim ægra de altera die conqueri, metu tertianæ, quam ante aliquot annos diuturnam experta erat, & factum est, ut febris rediret eodem tempore, quod sibi triste ac dolorosum fore firmiter credebat.

§. 39. Quis autem non animadvertit in ejusmodi casibus insignem esse impressionis vim excitandi & continuandi febrilem ideam. Ast fateor ultrò in omnibus ægrotis talem metum non habere locum, si quidem ex improvviso quoque adultis & infantibus citra omnem præscitum atque metum accidere potest febris satis regularis. Proinde Tertiò monendum est, occasiones externas s. errores v. g. in Diætâ, aere, ira &c. Plerumque id agere, ut certo ordine inchoetur typus febrilis, prout ex paulo superius recensitis observationibus luculenter apparet.

§. 40. Itaque ut summatim Doctrinam de typo febrium intermittentium expediam, dico, alias quidem habere principium reale, alias purè ideale, in progressu autem alias continuari per metum, alias per errores circa res non naturales, alias utroque modo. Interim quacumqve ex parte spectetur febris, certum est, causam proximam tam singulorum



paroxysmorum quam periodorum unice à Spiritibus peti posse, quippe quorum ideam quotidie, altera, tertia, vel etiam octava die, imò menstruatim, annuatim rursus evolvi, juxta circumstantiarum conditionem nil repugnat.

## CAPUT IV.

### Continens Februm intermittentium curam.

§. 1.

**E**Quidem nec tonfor est, nec lippiens anus, quæ non remedia eaque secreta contra febres ostentare, ac etiam interdum easdem cum laude propulsare queat. At verò ubi malum inveteratum fuerit aut saltem pertinacius, tum hæret mus in pice, præsertim si impudens febris medicastrum ipsum (den Sieber Docter) apprehendat ac divexet prope. Ut taceam plerosque sibi gratulari, quando ægrotantes è charybdi in scyllam deduxerant, i. e. febrem profligarunt feliciter, ægro interim vel contabescente, vel intumescente ab humoribus pravis atque hydropo.

§. 2. Id ergo nunc agam, ut demonstrem non esse tam vile aut ineptum etiam medicamentum atque consilium, quod non convenire interdum possit egregiè, si modo cum judicio & methodo adhibeatur. Quandoquidem verò nimis prolixum foret, methodum curandum febrium tradere secundum omnes diversitates causarum atque symptomatum; hinc jam satis mihi erit, vim saltem febrifugorum indicasse per summa capita, è quibus verum medendi modum non difficulter elicere poterit attentus Lector.

§. 3. Nimirum dixi superius, sedem omnium febrium intermittentium esse quidem in Spiritibus, ast rarò Humores omni carere culpâ, siquidem fieri potest, ut vel humorum vitia occasionem febrì subministrant, vel ab alia causâ, irâ, imaginatione, nausæâ &c. Febris oborta aperiat corpus jam jam impurum, vel deniq; ut cacochymia nascatur in ipsâ febre. Existimo igitur remedia illa omnia, quibus contra febres utuntur, ita commodè distingvi posse, ut alia respiciant vitia humorum, alia Spirituum ideam febrilem.

§. 4.



§. 4. Quæ humorum vitia spectant, vel Evacuantia sunt vel Alterantia. Ad evacuantia pertinent V. S. Sudorifera, Vomitoria Purgantia & Clysmata. Alterantia sunt aquea, Terrea, acida, alcalia, Salsa, aromatica, acria, amara & adstringentia. De singulis seorsim, sed quantum fieri potest, brevissimis agam.

§. 5. Primò V. S. sicuti directè sanguinis quantitatem imminuit, ita potissimum locum habet in subjectis plethoricis, ubi pulsus magnusprehenditur, vel solennis quidam fluxus v. g. mensium, vel hæmorrhoidum suppressus est, ubi in paroxysmo febrili (quale exemplum nunc mihi occurrit) sanguinem floridum rejiciunt ægri, item, si quis vel V. S. vel scarificationibus crebrioribus assuetus sit. Comperit enim est in ejusmodi casibus, symptomata pejora plerumq; remittere, æstus præsertim, inquietudinem, atq; dolorem circa tempora pulsantem &c.

§. 6. Sudorifera præcipuè corporibus serosis conveniunt & quibus febris contigit ex refrigerio, qui post commotionem violentam sudore perfusi vel aeri libero sese incautius exponunt, vel balneum frigidum ingrediuntur. In genere autem valent ejusmodi medicamenta ad quasvis febres cum horrore incipientes, si horâ una vel altera ante paroxysmum propinata fuerint; quatenus principium ejus eluditur, dum in lecto calentes & sudantes ægri accessum frigoris febrili non permittunt: hoc sensu febrifuga sunt sudorifera in genere omnia, sudoriferum maximum Fabri, Ant. diaph. simpl. & Mart. Ant. thect. Poter. Bezoard. mineral. Sol. Lunare. Joviale Martiale & cætera aliàs usitata, uti sunt Tinctura bezoard. Salia fix. & volat. rob sambuc. cum CC. oc. cancr. cum aceto. pulv. Card. bened. &c.

§. 7. Vomitoria tum maximè conducunt, quando ventriculus humoribus pravis, viscidis atq; biliosis refertus est, quando ægræstantes de dolore ventriculi gravativo, vel amarore oris, vel inappetentia omnimoda, nausæâ atqve propensione ad vomitum conquiescunt, imprimis si error manifestus in diætâ præcesserit. Constat autem per experientiam, emetica optimè tum convenire quando ante paroxysmum assumuntur, quoniam per commotionem istam non levem Idea febrilis interturbatur egregiè: nec metuenda hinc virium prostratio contrarium svadere potest, siquidem aut febris planè non sequitur



sequitur, aut saltem longè remissior, ita ut tantum feбри quantum viribus decedat. Relinquam aliis panaceas vomitorias et arcana similis farinae, mihi solus sapissime suffecit Mercur. vitæ, cujus loco vel Tartarum emet. vel croc. metall. sive in substantia sive infuso, item Vitriol. alb. & juxta Borelli C. 4. obs. 77. Cyprium recipiant alii, per me licet.

§. 8. Purgantia eodem modo propinari possunt, si non stomachus tantum, sed & intestina vitiosis humoribus onusta, totumque corpus cacochymicum fuerit. Novi non unum, qui pulvere Cornu-  
hini, pilulis Emanuelis & similibus, febres etiam pertinacissimas dosi  
liquoties repetita curarunt fundamentaliter. Nec reticebo penè quo-  
idianum mihi esse usum arcani duplicat. cum gum. gutt. in profligan-  
tis intermittentibus præsertim biliosis, postquam in Epist. Bartholini i-  
dem medicamentum insigniter laudatum, non contemnendæ utilitatis  
prehendi. Subjectis autem pituitosis magis appropriata est Emulsio  
esin. jalapp. atque Scammon. item si pulveres magis arrideant, cremor  
el crystalli ꝑi aut ꝑ  $\oplus$  latus cum scammonio rosato vel violato aut cy-  
loniato &c.

§. 9. Deinceps & Clysmata nonnunquam laudem merentur  
alvus pigrior sit, si dolores intestinorum atque dorsi vehementius urge-  
nt, si subjecta aliàs malo hypochondriaco vel affectibus lienis sint ob-  
noxia, si abdomen inflatum, durum atque spasmò tensum observetur, &  
potissimum ubi cacochymia evacuationem urgeat, ægri tamen per os  
pharmaca assumere detrectent. Quo in casu non est absolum etiam  
emeticum usitatis vel substituere vel superaddere e. g. absinth. centaur.  
min. card. bened. rut. veronic. adjecto pro ratione circumstantiarum  
Do, sal. ammon.  $\ominus$  e ꝑi, &c.

§. 10. Hactenus de Evacuantibus, qualia in humorum pec-  
antium quantitate præprimis imminuendâ requiri videntur. Verum  
cuti febris non semper ab horum usu desinit, ita & ipsæ ægrorum con-  
ditiones non raro eadem prohibent. Quidam enim V. S. vel etiam  
clysmata planè reformidant, alii ad sudorem nullo modo sese compo-  
nere possunt, alii ob metum hæmoptyses vomitoria respuunt, gravidæ &  
stantes ægrè ferunt purgantia, atque sic porro.



§. 11. Igitur nec Alterantia in febrium curâ contemnenda sunt. Certè  $\nabla$ a pura non semel febrem ardentissimam curavit, quando ex liberali frigidissimæ haustu vel vomitus, vel sudor largissimus provocatus est, Vid. Smetii miscell. med. pag. 161. & Stammers Reise Beschreibung pag. 116. Adeoque præter rem curiosi sunt, qui ejus potum in æstu (absque malignitate) febrili interdunt, cum tamen melius remedium excogitari nequeat, naturâ ipsâ indicante, nil ad calorem fitimque extinguendum frigidâ  $\nabla$  esse convenientius. Utinam verò in omnibus sufficeret, atque illud Amati Lusitani experimentum quod in Cent. 2. curat. 97. annotavit quartanam tolleret ubique, quemadmodum in biliosis subjectis satis probabile est, vomitum sequi laudabilem si in principio paroxysmi cum frigus quartanarium torquet, cyathus  $\nabla$  rosarum ebibatur.

§. 12. Terreæ absorbentia seu præcipitantia dicta, quorum ingens usus & abusus in curâ febrium est, commodè præscribuntur ad absorbendum acidum bilisque visciditatem præcipitandam, quo nomine commendatissima sunt. C.C. Eb. ust. Oc. 69. off. sep. Corall. mater perlar. conchar. testæ, crySTALL. mont. lap. lync. &c. Et quod alibi de bol. armen. atque Terra Sigill. annotavi, idem quoq; de lapide scissili, cujus mentio fit in Misc. Nat. Cur. Ann. 3. obs. 13. experimento, diversis in subjectis repetito, didici quodammodo hypnoticam facultatem ei esse propter Sulphur connatum, siquidem plerique post usum ejus blandi solvuntur somno.

§. 13. Acida in cruditate nidorosa ad fitim æstumque extinguendum mirè valent, præsertim si  $\nabla$ eis probè diluta fuerint. Usitatissima sunt Spir.  $\oplus$ li, Sulphris,  $\ominus$ is,  $\oplus$ i,  $\oplus$ i bez. Clyss. ant. & cum his præparatæ Tinct. ros. fl. bellid. &c. item succus citr. aurant. acidorum, mæpunci, ribium, berberum, ceraforum acidorum &c. Mihi per cæterum arridet Spir.  $\oplus$ li Philosophicus vulgò dictus, quod plerumque fortasse propter particulas antimoniales in eo delitescentes alvum simul movere soleat, cum primis si cum Syrupo violarum in formâ julepi exhibeatur.

§. 14. Alcalia tam fixa e.g. absinth. Card. bened. centauremin. Tart. &c. quàm volatilia, Spir. Sal. ammon. C.C. essentif. Tart. volatil. carminat. de tribus in cruditate acida & pituitosa omnino sunt optima, quatenus hanc incidendo illam saturando corrigunt. Speciali



præ reliquis  $\ominus$ ia vol. plantarum cephalic. majoran. rorismar. saly. at-  
que ruta extollit. Helmont in Tr. de febr. cap. 14. p. m. 776. præsertim si  
ante paroxysmum in vino vel aceto potentur; ast hoc pacto vim quidem re-  
solvendi pituitam ac sudorem movendi non amittunt, ad acidum au-  
tem destruendum sunt invalida.

§. 15. Etenim nec  $\ominus$ orum Virtus antifebrilis contemnen-  
da, ubi non tantum mucus viscidus sed & bilis è ventriculo atque inte-  
stinis eliminanda veniunt. Hunc in finem  $\ominus$  absinth. cum Spir.  $\oplus$ li  
niscet Crollius, cum Spir. sulphur. Riverius; quorum loco  $\mp$   $\oplus$ latus,  
al. ammon. & arcanum duplic. ritè paratum,  $\oplus$  antim. imò &  $\oplus$  ipsum,  
si æstus sit vehementior præscribi potest. Spectat huc quoque  $\ominus$  com-  
mune quod per crebriora tentamina lanio quidam didicit, mihiqve  
tanquam arcanum probatissimum communicavit jam olim. Viderat  
hic ipse biliosam cruditatem ex intestinis atque stomacho porcorum non  
melius quam attritu  $\ominus$ is comm. extergi; itaque cum febre biliosa cor-  
ceptus, multisque medicamentis frustra usus esset,  $\ominus$ is comm. vires ten-  
taturus,  $\nabla$  s. solutum ejus manipulum potat jejuno stomacho, & ecce vo-  
mitus pravorum humorum paulò post sequitur enormis, febrisque ea-  
dem die desinit.

§. 16. Porro aromatica quoque excellentissima ad pituitam  
resolvendam sunt in febribus purè algidis, cinam. puta,  $\ominus$  M. Carda-  
mom. Cubeb. Zingib ac potissimum piper cum caryophyllis. Opti-  
mo autem consilio exhibentur ante invasionem, adeoque rectè juxta  
Galenum grana 5. vel 6. piperis integra in accessu frigoris cum vino  
generoso dedit Amatus Lusitanus l. c. & tanquam sæpius à se expertum  
probavit. De Caryophyllorum autem oleo curiosum est, id, notante  
R. de le Boe Sylvio, in Med. Pract. saltem scrobiculo cordis inunctum  
impedire febris horrorem. Consistit enim aromatum virtus calefa-  
ciendi in hoc potissimum, quod acrimonia eorum singularis ac  
stomacho grata tunicas ejusdem vellicet ac pungat, eoque ipso Spiri-  
tum affluxum uberiores promoveat. Quoniam vero in frigore fe-  
brili Spiritus retrocedunt, hinc adversus illud magis opportunum exco-  
gitari non potest remedium, quam quod indefinenter sollicitando eos-  
dem contrarium in motum ciet.

§. 17. Verum præter hæc aromata dantur & alia acria in cura



februm itidem non vilipendenda, Tinct.  $\Phi$ i, Tinct. ant.  $\Phi$ isata, nasturtium, cochlearia, radix ari, helenij & armoraceæ, & quæ paulò mitiora sunt, sed in resolvenda pituita non ultima, lignum Guajacum & Saffras, chamomilla cum Betonica, hypericum &c. Huc referri potest radix asari, quæ utut cruda magna cum anxietate vomitum moveat, in  $\nabla$  tamen decocta vim potius aperitivam ac diureticam exerit, annotante Hoffmanno in M. M. p. 195.

§. 18. Restant amara, quæ propter facultatem vel stomachicam, veletiam sudoriferam plerisque in febribus exhiberi possunt, qualia sunt absinth, centaur. min. Card. bened. rad. gentian. Myrrh. &c. ubi obiter moneo, aliud esse, si hæc ipsa propinentur in substantia vel decocto cum  $\nabla$  simpl. parato, aliud, si infundantur in vinum, vel eorundem essentia cum Spiritu vini facta fuerit; siquidem hæc ipsa non æque ac illa convenire constat iis in febribus, quæ vehementiore æstu ægros infestant. Idem hoc de cortice peruviano, Gannanaperide, vel ut alias vocatur china chinæ censeo, utpote qui præ cæteris amaris aut febrifugis revera nihil peculiare, aut tanta laude dignum præstat. Certè si genuinum siue adulteratum sit, quod venditur, observavi ab ejus usu interdum quidem febrem aliquandiu delituisse, sed plerumq; subsecutam pejorē recidivam, in aliis & frustraneum & magis nocivum extitisse, quamvis omni cura nunc in substantia, nunc cum vino, nunc saltem infusum vel extractum ejus tam ante paroxysmum quam post eum, exhibitum fuerit. Adhæc Dosis ejus ubi sæpius repetenda, pauperibus pretiosa omnibus nauseosa est nimium.

§. 19. Tandem nec Adstringentibus omne denegandum est encomium, præsertim si cum vomitu vel alvi fluxu, vel hæmorrhagiâ conjunctæ sint febres. Sanè alumini sangvine Draconis tincto mirandam efficaciam adscribit Mynsicht p. 28. idem cum nuce moschata, olivano, pipere atque caryophyllis admodum deprædicatur in appendice ad Annum VI. M. N. C. p. 169. & Hartmannus atq; Grülingius non veriti sunt, id pondere  $\mathfrak{ss}$  in  $\nabla$  vel decocto centaur. minoris porrigere. Radix tormentillæ quibusdam inter secretiora numeratur, & mihi pulvis terra sigillata cum saccharo Saturni & hæmatite vel Vitriolo Martis non semel præsentaneum comprobavit auxilium. Idem hoc de floribus Sal ammon. cum hæmatite vel batitura ferri aliquoties sublimatis atte

stat



uari vaierem, nisi sapor eorum vix tolerandus crebriorem dispensationem pene disuaderet.

§. 20. Loco Epimetri obscœna atqve inepta nonnullis contra febres usitata medicamenta subnecterem; Sed quoniam indigna sunt quorum nomina cœteris medicamentis adscribantur, atqve à medico ingenuo non sine artis dedecore tractari queant, uti sunt Urina, stercus canis ossa rodentis, honestiori titulo albi græci palliatum &c. Igitur linquamus ea suis Autoribus, cimices deglutiendas Athanasio Kircheri, stercus vaccæ calidum ac recens Rulando, stercus suillum Monacho illi Dominicano, cujus meminit observatio CXX. Anni III. M. N. C. p. 192.

§. 21. Progredior potius ad illa febrium remedia, quæ Spirituum ideam febrilem tollunt; sed eorum ratio non una est, siquidem alia operantur Spiritus sedando, alia eos roborando vel commovendo, vel divertendo, vel fallendo. Sedant autem Spirituum motum inordinatum præ cœteris opiata ante paroxysmum propinata cum appropriatis; Si enim somnus sequatur, largiter ut plurimum sudant ægri, ac interim nil mali sentiunt, nil timent, tandemque expergefacti, ubi tempus paroxysmo destinatum præterisse intelligunt, hilares de felici cura sibi gratulantur. Vide exemplum illustre in Bartholini Historiis Anatom. Centur. 1. Hist. 84. p. 137.

§. 22. Simili ferè pacto juvant ad ardorem potissimum vel præcavendum vel extingvendum sulphurea illa & oleosa ac gelatinosa Refrigerantia, succinum, emulsiones seminum frigidorum, pinearum atqve amygdalarum dulcium, gelatina C. C. atqve Eboris &c. nam & hæc ipsa non modo acrimoniam, si quæ adsit, corrigunt, sed & plerumqve placidum inducunt somnum, fervorem Spirituum leniter figendo ac demulcendo.

§. 23. Quemadmodum verò hæc ipsa in subjectis calidioribus ac febribus ardentibus locum habent, ita, si frigus ægrum vexet debiliorem, spirituosiora potius, quæ Spiritus animales robovent, videntur requiri. Modicum quidem  $\nabla$ æ vitæ Lotichius in se ipso efficacissimum deprehendit, quod ante invasionem assumerat saccharo paulisper edulcoratum. Ast nec desunt, qui vinum quoque ac cerevisiam ad ebrietatem usque & vomitum ingurgitant, eoqve ipso imminuentem febrem tollunt.



§. 24. Idem alii oporato cum successu tentant, commovendo corpus, ambulando, equitando, saltando &c. Quamdiu enim Spiritus exagitantur, tamdiu retrocessionem febrili ac frigoricā non conceditur spatium. Sic olim Quintus Fabius Maximus, postquam diu quartana detentus plurima incassum adhibuisset remedia, tandem conferto cum Allobrogibus praelio febrem pugnandi ardore discussit, teste Livio.

§. 25. Nec dubium est exandescentiam Spirituum in hoc quoque casu multum contribuissē cum aliis constat, motus animi interdum idem quod corporis valere. Siquidem Greulich in Tr. de bile & gra & sana p. 44. Casus ejusmodi narrat febris per iram curatā; ac lectu jucundissima est Borrichii cura, qua per lagenas  $\nabla$ a fervida plenas in foemina illustri medicamenta omnia respuente, indignationem prius quam sudorem movit de industria Vid. A. III. M. N. C. p. 427.

§. 26. Idem quoque in aliis terrorem subitaneum praestitisse; tradunt historiae à Pareo libr. I. cap. 32. annotatae: videlicet protrudebatur nobilis quidam Gallus inopinato in flumen, circa cujus ripam deambulabat ad evitandum quartanae insultum, atque tum statim curatur, amici joco plus valente quam medicamento ullo. Alius cum ei in conflictu glans plumbea cervicem perforasset, tanto mortis terrore perculsus est, ut febris ardor tum instans metui cesserit frigido, ac deinceps à quartana immunis supervixerit diu.

§. 27. Habent enim & Fontanellae & Vesicatoria hunc nonnunquam usum, ut si dolor in eorum applicatione excitetur ante paroxysmum, Spiritus divertantur, febrilemque ideam perdant oblivione laudabili. Proinde non ineptum est, ranunculum acrem, cepas, allium sinapismos atque acriora Emplastra vesicatoria manuum carpis imponere. Tale cataplasma febrile ex allio,  $\ominus$  e croco & aceto, quo plus quam centum personae sanatae sunt, prostat in appendice Anni VII. M. N. C. p. 176. Ubi tamen haec circumstantiae peculiares simul indicantur, ut tempore paroxysmi applicetur, & quidem digito annulari sinistro, sicque praeteritis novem diebus eadem hora, qua fuit adhibitum, auferatur & projiciatur in  $\nabla$ m fluminis.

§. 28. Verum dantur & alij modi Spiritus divertendi, atque abstrahendi à metu ingruentis febris, inter quos ultimus non est confabulatio & lusus. Instar omnium sit observatio Schenckij quam è Bru-



do Lusitano l. 6. p. 137. recenset de juvene in tertiana desperante cui  
tempus paroxysmi eleganti fraude celatum alex lusu terebatur ab ipso  
Medico, ac postmodum non revertebatur, qua antehac laboraverat,  
tertiana.

§. 29. Et jam hæreo, annon sæpius fallantur Spiritus per A-  
muleta curasque transplantatorias & alia superstitiosa remedia. Sicut  
enim fiducia erga Medicum aut Medicamentum plus non ratò juvat,  
quam generosum quodvis arcanum (id quod juvenis chartam recepta  
signatam arenaque conspersam assumens satis probat juxta observat. 92.  
Ann. VI. M. N. C. p. 149.) ita nec mirum est, si febris ineptissimo etiam  
consilio cedat, quandocunque certa spe salutem sibi pollicetur æger.

§. 30. Quid enim quæso cranium canis lecto occultatum, A-  
muletum ex millepedibus collo appensis, aut aranea nucis putamine in-  
clusa, pilis barbæ, characteribusque adornatum ad febrem? quid un-  
guibus resectis quos cancro alligare jubent, quid Urinæ cum ovo coctæ  
vel in fluvium effusæ commune cum ægro? ut alia taceam.

TANTUM.





# COROLLARIA:

I.

Medicina conjecturis non inni-  
titur.

2.

Verba quoque vim medendi ha-  
bent.

3.

Luna non est fons frigoris.

S. D. G.